



NACRT

Na osnovu člana 13. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine" broj: 49/06, 51/09) i članova 23. i 25. Statuta Općine Stari Grad Sarajevo – Prečišćeni tekst („Službene novine Kantona Sarajevo“, broj: 20/13) i Smjernica o minimalnim standardima dodjele proračunskih sredstava putem transfera i subvencija u Federaciji Bosne i Hercegovine („Službene novine Federacije Bosne i Hercegovine“ broj: 15/18), na sjednici održanoj dana _____, Općinsko vijeće Stari Grad Sarajevo, donosi

O D L U K U

o kriterijima i postupku dodjele sredstava iz budžeta Općine Stari Grad Sarajevo za projekte elektronskih medija

I – OPĆE ODREDBE

Član 1.

(Predmet Odluke)

Ovom Odlukom utvrđuju se kriteriji i postupak dodjele finansijskih sredstava iz Budžeta Općine Stari Grad Sarajevo (u daljem tekstu: Općina) za projekte elektronskih/digitalnih medija (u daljem tekstu: elektronski mediji).

Član 2.

(Korisnici prava)

Korisnici prava prema odredbama ove Odluke su elektronski mediji, koji ispune uvjete Javnog poziva i budu im dodijeljena finansijska sredstva iz Budžeta Općine Stari Grad Sarajevo shodno odredbama ove Odluke.

Član 3.

(Aplikant)

Aplikanti prema odredbama ove Odluke su elektronski mediji, koji podnose prijavu na objavljeni Javni poziv za dodjelu finansijskih sredstava iz Budžeta Općine.

II – OPĆI I POSEBNI KRITERIJI ZA DODJELU FINANSIJSKIH SREDSTAVA ZA PROJEKTE

Član 4.

(Kriteriji za dodjelu finansijskih sredstava)

Kriteriji za dodjelu finansijskih sredstava iz Budžeta Općine shodno odredbama ove Odluke utvrđuju se kao:

- opći kriteriji;
- posebni kriteriji.

Član 5.

(Opći kriteriji)

Opći kriteriji, koje elektronski mediji moraju ispuniti za dodjelu finansijskih sredstava iz Budžeta Općine za projekte po raspisanom Javnom pozivu su sljedeći:

- da su osnovani i registrovani u Bosni i Hercegovini;
- da je projekat usmjeren na aktivnosti i djelatnosti na području Općine;
- da se projektima doprinosi realizacija ciljeva i prioriteta, koje je Općina odredila kroz relevantne strateške dokumente;
- opravdana finansijska sredstava koja su dodijeljena za projekte elektronskih medija za prethodne godine, ukoliko su ista bila dodijeljena.

Član 6.

(Posebni kriteriji)

- (1) Posebni kriteriji, koji se boduju na skali od 1 do 5, po kriteriju za dodjelu finansijskih sredstava iz Budžeta za projekte elektronskih medija su:
 - ekonomska ili društvena opravdanost projekta, čije finansiranje se predlaže, za Općinu i stanovništvo Općine;
 - rezultati koji se projektom mogu postići na lokalnom, kantonalnom, federalnom, državnom ili međunarodnom nivou;
 - efekti projekta, koji su evidentni i mjerljivi na populaciji koju zastupa;
- (2) Izuzetno od odredbi stava (1) ovog člana dodatno se boduje na skali od 1 do 10 kriterij:
 - Vidljivost i posjećenost portala prema službenim mjerenjima i istraživanjima.

III - JAVNI POZIV ZA DODJELU FINANSIJSKIH SREDSTAVA ZA PROJEKTE

Član 7.

(Javni poziv)

- (1) Finansijska sredstva iz Budžeta Općine za projekte elektronskih medija dodjeljuju se isključivo putem Javnog poziva, koji raspisuje Općinski načelnik nakon usvajanja Budžeta.
- (2) Javni poziv iz stava (1) ovog člana ostaje otvoren 15 (petnaest) dana.

- (3) Javni poziv se objavljuje u jednom dnevnom listu i na web stranici Općine Stari Grad Sarajevo.

Član 8.

(Sadržaj Javnog poziva)

- (1) Javni poziv obavezno sadrži:
- Naziv organa koji raspisuje poziv;
 - Spisak dokumentacije koja se obavezno dostavlja uz prijavu;
 - Aplikaciju za prijavu na Javni poziv;
 - Rok za prijavu na Javni poziv;
 - Iznos finansijskih sredstava, koja su predviđena za projekte;
 - Broj projekata koji se mogu prijaviti na Javni poziv;
- (2) Sastavni dio Javnog poziva je aplikacija za prijavu na isti.

Član 9.

(Dokumentacija za prijavu na Javni poziv)

Uz popunjenu aplikaciju, koja je sastavni dio Javnog poziva, za prijavu na isti, aplikant je obavezan dostaviti sljedeću dokumentaciju:

- Opis projekta, koji sadrži ciljeve projekta, potrebna sredstva za realizaciju projekta i period trajanja projekta;
- Rješenje o registraciji;
- Uvjerenje o poreskoj registraciji – identifikacioni broj;
- Izvještaj o urednom finansijskom poslovanju (bilans stanja, bilans uspjeha i narativni izvještaj za prethodnu godinu);
- Dokaz o urednom pravdanju sredstava dodijeljenih u prethodnim godinama iz Budžeta Općine.

IV – KOMISIJA ZA POSTUPANJE PO APLIKACIJAMA NA JAVNI POZIV

Član 10.

(Komisija)

- (1) Općinski načelnik nakon usvajanja Budžeta za tekuću godinu, a prije raspisivanja Javnog poziva iz člana 7. ove Odluke, imenuje Komisiju za postupanje po aplikacijama na Javni poziv za finansiranje projekata elektronskih medija (u daljem tekstu: Komisija).
- (2) Komisija se imenuje na period od 12 (dvanaest) mjeseci i broji 5 (pet) članova, od kojih je jedan predsjednik Komisije. Komisiju čine 3 (tri) člana koji su državni službenici i 2 (dva) člana koji su predstavnici Općinskog vijeća Stari Grad Sarajevo.
- (3) Komisija ima zadatak da svaki mjesec napravi presjek svih pristiglih aplikacija, tako da:
- Pregleda sve aplikacije sa dostavljenom dokumentacijom i opisom projekta;

- Aplikacije uz koje nije dostavljena obavezna dokumentacija iz člana 9. ove Odluke, odbacuje kao da nisu ni podnesene i o istom obavještava aplikanta pismenim putem;
- Aplikacije koje ispunjavaju opće i posebne kriterije utvrđene ovom Odlukom dostavlja Općinskom načelniku na dalje postupanje uz preporuku da li da odobri dodjeljivanje sredstava za predmetni projekat.

V – ODLUKA O DODJELI FINANSIJSKIH SREDSTAVA ZA PROJEKTE

Član 11.

(Odluka o dodjeli finansijskih sredstava)

Općinski načelnik na osnovu preporuke Komisije iz člana 10. ove Odluke donosi akt kojim odlučuje o dodjeli finansijskih sredstava – granta elektronskim medijima za projekte u tekućoj godini.

Član 12.

(Ugovor sa korisnicima finansijskih sredstava)

- (1) Općinski načelnik po osnovu akta iz člana 11. ove Odluke, zaključuje ugovor o dodjeli finansijskih sredstava sa elektronskim medijima.
- (2) Dodijeljena sredstva po osnovu ugovora iz stava (1) ovog člana elektronski medij obavezan je opravdati najkasnije u roku od 12 (dvanaest) mjeseci od dana potpisivanja istog.
- (3) Ukoliko se ne opravdaju sredstva na način utvrđen stavom (1) ovog člana, podnosilac zahtjeva je obavezan finansijska sredstva vratiti u roku 30 (trideset) dana, u protivnom će se pokrenuti postupak pred nadležnim sudom putem Pravobranilaštva Općine Stari Grad Sarajevo, a isti neće imati pravo na dodjelu sredstava iz Budžeta Općine narednih 5 (pet) godina.

VI – PRAĆENJE REALIZACIJE PROJEKATA I UTROŠKA SREDSTAVA

Član 13.

(Komisija za praćenje realizacije projekata)

- (1) Općinski načelnik posebnim rješenjem formira Komisiju za praćenje realizacije i utroška dodijeljenih sredstava za tekuću godinu po osnovu svih javnih poziva po kojima se dodjeljuju sredstva iz Budžeta Općine Stari Grad Sarajevo, a koja prati i utrošak i pravdanje finansijskih sredstava dodijeljenih po osnovu svih javnih poziva tokom godine, ukoliko posebnim aktom nije drugačije određeno.
- (2) Zadatak Komisije je da:
 - Kontinuirano prati realizaciju projekata od potpisivanja ugovora iz člana 12. ove Odluke;
 - Kontinuirano prati pravdanje finansijskih sredstava dodijeljenih po osnovu ugovora iz člana 12. ove Odluke;

- Dostavlja izvještaj Općinskom načelniku svakih 6 (šest) mjeseci o praćenju realizacije projekata;
- Dostavi izvještaj Općinskom vijeću 31.12. tekuće godine u kojem će biti detaljno navedeni rezultati praćenja projekata, kao i koji elektronski mediji su opravdali dodijeljena sredstva, a koje nisu.

VII - PRELAZNE I ZAVRŠNE ODREDBE

Član 14.

(Stupanje na snagu Odluke)

Ova Odluka stupa na snagu osmog dana od dana objavljivanja u Službenim novinama Kantona Sarajevo.

PREDSJEDAVAJUĆI
OPĆINSKOG VIJEĆA STARI GRAD
SARAJEVO
Seid Škaljić

Broj:

Datum:

O B R A Z L O Ž E N J E

I - PRAVNI OSNOV

Pravni osnov donošenja ove Odluke sadržan je u odredbama člana 13. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine" broj: 49/06, 51/09), kojima su utvrđene nadležnosti Općinskog vijeća, dok je članovima 23. i 25. Statuta Općine Stari Grad Sarajevo – Prečišćeni tekst („Službene novine Kantona Sarajevo“, broj: 20/13), utvrđeno da je za donošenje propisa i akata u okviru prava i dužnosti Općine nadležno Općinsko vijeće.

II - RAZLOZI DONOŠENJA

Uvažavajući uticaj i snagu koju elektronski mediji imaju na društvenu zajednicu, kao i neophodnost povezivanja strateških ciljeva Općine kao jedinice lokalne samouprave, utvrđena je potreba da se finansiraju projekti elektronskih medija, putem Javnog poziva, uz ispunjavanje kriterija utvrđenih ovim Pravilnikom.

Uvažavajući naprijed navedeno, predložena je odluka kojom se uređuju uslovi, kriteriji cjelokupan postupka dodjele sredstava, uz poštivanje principa transparentnosti, ali i uvođenje Komisije za praćenje pravdanja sredstava dodijeljenih elektronskim medijima za predložene projekte putem Javnog poziva.

III – OBRAZLOŽENJE

Odlukom je predviđeno ukupno sedam poglavlja, na način kako slijedi:

I – Opće odredbe

II – Opći i posebni kriteriji za dodjelu finansijskih sredstava za projekte

III – Javni poziv za dodjelu finansijskih sredstava za projekte

IV – Komisija za postupanje po aplikacijama na Javni poziv

V – Odluka o dodjeli finansijskih sredstava za projekte

VI – Praćenje realizacije projekata i utroška sredstava

VII - Prelazne i završne odredbe

IV - FINANSIJSKA SREDSTVA

Za provođenje procedure usvajanja ove Odluke nisu potrebna finansijska sredstva, dok su za realizaciju iste potrebna finansijska sredstva koja je potrebno predvidjeti u Budžetu Općine.

Predlagač:

Općinski načelnik putem

Službe kabineta Općinskog načelnika